



## Terenga 4: Hōtaka 19 - Ina, Mena

### He Mihi

E te aitanga a Puna, tēnā rā tātou i te rauhītanga o ō tātou manako kia ora te reo kāmehameha i tukuna iho mai ki a tātou.

### Hei Mahi Whakarongo

He tohutohu tamariki te kaupapa o te whakataukī e whakamāramahia ai e Ngāringi Kātīpa ā kō ake nei. I a koutou e whakarongo ana, anei ngā pātai hei ārahi i tā te taringa rahirahi mahi.

- 1) Ā whea rangona ai te reo o te ngārara nei?
- 2) He pēhea te āhua o tōna reo?
- 3) He aha anō ētehi tohutohu e ngāwari ai te reo o te tamariki?

### He Whakamārama

Hei whakamāori i te kupu 'when' e pā ana ki te wā kei te heke mai, ka whakamahia ngā kupu nei:

1. **Kia** tae atu koe, me mihi te hau kāinga.
2. **Ka** tae **ana** koe, me mihi te hau kāinga.
3. **Ina** tae atu koe, me mihi te hau kāinga.

Hei whakamāori i te kupu 'if' ka whāia ēnei kupu:

1. **Mena** ka haere koe, waea mai.
2. **Me** ka haere koe, waea mai.
3. **Mehemea** ka haere koe, waea mai.
4. **Ki te** haere koe, waea mai.
5. **Ina** haere koe, waea mai.

He āhua kaha ake te 'Ina' i te 'Mena' i ēnei taurira. I ngā taurira 1-4, kāore tātou i te tino mōhio mena ka haere te tangata, kāore rānei. I te taurira 5, e kitea ai te 'Ina', kua āhua tau te whakaaro, kāore e kore ka haere te tangata.

### Hei whakatūpato:

- kāore he pū i muri i te kupu 'Ina'. \**Ina ka pērā...* ☹ > *Ina pērā...* ☺
- ka tōia te 'Inā' e ētehi kaikōrero matatau
- He tikanga rerekē tō te kupu 'Inā' i ētehi horopaki, pēnei i te taurira nei: 'Inā te nui o tērā whare!'

### Hei Mahi

Panonihiā ngā rerenga kia tīmata kē ki te kupu 'Ina':

1. Mehemea ka haere koe, me whāki atu.
2. Ki te kore koutou e kite i ngā hua, kua e whai atu.
3. Ka kitea ana ōna tuākana e ia, ka tangi ia.
4. Kia rongo kōrero koe, pātuhi mai.

### Whakautu:

1. Ina haere koe, me whāki atu.
2. Ina kore koutou e kite i ngā hua, kua e whai atu.
3. Ina kitea ōna tuākana e ia, ka tangi ia.
4. Ina rongo kōrero koe, pātuhi mai.